

diadakan ertinya yang demikian itu mengambil kuasa Raja-raja dan kerana itu maka dinyatakan, bahawa berkenaan agama tidak dicampuri – yang demikian itu terpulang kepada kebijaksanaan masing-masing. ertinya Raja masing-masing negeri berkuasa di atas kemajuan dan pertadbiran yang mengenai agama.

Ini adalah sangat-sangat didukacitakan oleh umat Islam kerana daripada pengalaman-pengalaman yang telah lalu dengan masing-masing negeri berkuasa mentadbirkan agama di dalam negeri masing-masing penyatuhan pendidikan agama pembahagiaan wang untuk pertadbiran agama tidak mencukupi bahkan banyak yang terjadi langkah-langkah yang diambil atau yang dijalankan mengikut semahu-mahu sahaja, mengikut bijak pandai ketua-ketua agama yang diberi kuasa oleh sultan masing-masing negeri itu.

Adakalanya jabatan-jabatan itu dipenuhi oleh kaum keluarga sendiri dan adakalanya dijalankan mengikut kemahanan dan kebijaksanaan sendiri tidak mahu menerima bantahan dan apabila ada bantahan-bantahan dari kakitangan mereka maka kakitangan-kakitangan itu akan dipindahkan jauh-jauh daripada kampung halamannya sebagai hukuman kepada perbuatan atau teguran-teguran yang didatangkan kepada ketua itu.

Melihat ini semua dan melihat segala kejadian-kejadian itu maka tidak akan ada ertinya agama rasmi bagi Persekutuan Tanah Melayu itu diisytiharkan. Isytihar itu hanya, menurut pandangan sebahagian orang, hanya sebagai suatu topeng menarik perhatian orang-orang Islam kepada cita-cita menegakkan hukum-hukum Islam di negeri ini. Tidak ada harapan sama sekali bahagian pelajarannya akan dapat disatukan dalam tiap-tiap negeri dan tidak ada harapan rakyat akan dapat dicukupkan pengertiannya dengan pengertian agama yang sebenar kerana di dalam negeri-negeri yang berjalan sekarang kuasa di tangan Raja dan setengah-setengah kuasa Raja-raja itu pada setengah-setengah tempat tidak membenarkan sama sekali perjalanan agama dilancarkan kerana menjaga kedudukan dan

maslahat dari Raja-raja itu sendiri.

Sebab itulah kita berharap orang-orang Islam khususnya yang ada di dalam UMNO akan memperjuangkan sedapat-dapatnya supaya Kementerian Agama diadakan untuk menyatukan pertadbiran-pertadbiran agama kalau tidak agama hanya ertinya cogan negara sedang isinya tidak ada.

Mudah-mudahan Allah memberi taufik kepada saudara-saudara kita umat Islam khususnya di dalam UMNO untuk memperjuangkan dengan bersungguh-sungguh supaya kuasa agama terletak di dalam Kementerian Agama yang ditadbir dan diawasi oleh rakyat.

* * *

Bahaya Komunis

Berita-berita tentang kemenangan Komunis di Jawa Tengah adalah satu perkara yang patut mendapat perhatian bagi kita seluruh umat Islam. Kemenangan Komunis itu tidak lain jalannya ialah kerana kekuatan siasah di Indonesia dalam mana yang bertanggungjawab besar dalam hal ini ialah Presiden Sukarno yang dari dahulu semenjak kejadian di Amuntai terang-terang memusuhi Islam.

Kemenangan Komunis di Jawa Tengah itu itu bermakna kekuasaan Komunis di sana akan bertapak, dan kedudukan orang-orang Islam di Jawa bakal terancam iaitu apabila orang-orang Komunis itu menggunakan kekuasaannya. Walhasil kejatuhan umat Islam di Indonesia sebab-sebabnya yang besar ialah perbuatan Sukarno kerana menjaga maslahat dirinya dan berat kepada Komunis serta anti kepada Islam.

Melihat kepada perkembangan itu maka orang-orang Masyumi telah tiba masanya meandang perjuangan menegakkan negara Islam di Indonesia tidak dapat dijalankan lagi dengan cara perlombagaan tetapi hendaklah bagi Masyumi dan parti-parti Islam menyertai perjuangan *Dār al-Islām* dan

menyusun pula gerakan-gerakannya di luar Pulau Jawa mengambil kekuasaan supaya negara Islam ditegakkan di tempat-tempat selain Pulau Jawa sambil memberi sokongan kepada gerak-gerak *Dār al-Islām* di Jawa Barat, diperkuatkan perjuangan mereka supaya dapat menghancurkan tenaga musuh Islam itu dengan kekuatan – jihad yang berdarah.

Kemenangan Komunis di Jawa Tengah itu patutlah mendapat perhatian Tengku Abdul Rahman Ketua Menteri Persekutuan Tanah Melayu yang tidak lama dahulu menyebut dengan tegas bahawa gerakan Komunis adalah gerakan musuh Tanah Melayu. Kejadian yang berlaku di Pulau Jawa itu sepatutnya menjadikan Tengku lebih tegas lagi dalam menghadapi Komunis daripada menyerap ke dalam jiwa orang-orang Melayu terutamanya pemuda-pemudanya.

Salah satu ikhtiar yang patut diperhatikan oleh Tengku hendaknya gerak melawan Komunis itu bukannya sahaja dari segi alat senjata tetapi yang lebih utama ialah dalam segi memberi faham kepada orang-orang kita Melayu yang beragama Islam akan ertinya Komunis dan bahaya-bahayanya kepada Islam. Pihak Qalam mengaku akan memberi kerjasamanya yang penuh kepada Tengku jika dikehendaki, dalam perkembangan memberi keterangan-keterangan ini.

Pihak Qalam dengan anjurannya, persahabatan Ikhwan, telah pun mengadakan beberapa syarahan, risalah-risalah dan

kenyataan-kenyataan yang tepat di dalam “Qalam” dan di majlis-majlis tentang bahaya Komunis itu. Juga pihak Qalam sentiasa berusaha apabila sahabat-sahabatnya datang supaya memberi syarahan-syarahan khususnya dalam radio akan bahaya Komunis itu dari segi dan pandangan orang-orang Islam.

Sungguhpun segala langkah Qalam, dengan penerbitan-penerbitannya itu, dituduh oleh sebahagian pihak sebagai alat penjajah-penjajah itu tetapi Qalam berkeyakinan terus akan memberi kerjasama kepada sesiapa jua pun yang mengenai perkara-perkara dalam mengingatkan umat Islam daripada dipengaruhi oleh Komunis dan diceburkannya ke dalam kancang Komunis itu. Ini kita jalankan adalah sebagai suatu kewajipan dan tanggungjawab kita kepada agama. Sebab itulah kita terus memperjuangkan walaupun apa hendak dikatakan orang.

Dengan perdirian yang tepat ini maka kita adalah sentiasa memberi kerjasama kepada sesiapa pun dalam menghadapi bahaya-bahaya Komunis di tanah air kita. Diharap benar perkara ini menjadi perhatian bersama.

“Berbaktilah kepada Allah di mana engkau berada, dan iringilah kejahatan itu dengan kebaikan nescaya ia menghapuskan kejahatan itu dan kawalilah manusia dengan perangai yang baik. Maksud – hadis.

“UMNO juga berjanji memelihara asas-asas pemerintahan demokrasi secara parlimen yang bertanggungjawab, melembagakan, mengawal dan memelihara kebebasan beragama, berfikir, berucap, menulis, berhimpun dan mengadakan persatuan-persatuan, juga menghormati, mengawal dan memelihara kepentingan-kepentingan kumpulan-kumpulan kaum yang kecil. Maka semua perkara-perkara yang dijanjikan ini akan tertulis di dalam perlembagaan untuk menjadi dasar pemerintahan Malaya akan datang” – cabutan daripada penyata

tahunan UMNO tahun 1956-57.